

Re ruca'n carta re xutz'ibaj can re apóstol San Juan

Re nabey tak tzij chin re carta re'

¹Yen Juan, re ec'uay* quichin re hermanos, nintz'ibaj-a re carta re' chava rat hermana re yatcha'on roma re Dios. Nintak-a ruxnokil-quivach re aval. Can katzij yixinjo'. * Y man xe-ta yen re yinjovan ivichin, xa can yixquijo' chuka' conojel re nic'aj chic re quitaman chic re katzij ch'abal. ²Y roma c'o re katzij ch'abal pa tak kánma, mare' nakajo-ki'. Y re katzij ch'abal xtic'ue' kaq'uin chin nojel tiempo. ³Y can-ta q'uiy utzil xtic'ul chiyixnojel riq'uin re Karta' Dios, y riq'uin chuka' re Ajaf Jesucristo re Ruc'ajol re Karta' Dios, y can-ta xtijoyovax ivach. Y chuka' re ivánma* can-ta otz nuna' roma iniman chic. Can xtic'ul-va ronojel re', roma ibanon confiar-ivi' riq'uin re katzij ch'abal y roma chuka' yixjovan.

Can nojel tiempo takatzekelbej re katzij ch'abal

⁴Yen camas xinqui'cot pa vánma tak xe'nvel jun ca'e' chique re aval che can quitzekelben re katzij* ch'abal, can ancha'l nubij re Karta' Dios chaka chupan re ruch'abal. ⁵Y vocame hermana, ninchalabej chava che tabana' re nubij re mandamiento chin re Dios, che can takajo-ki'. Y re mandamiento re' man c'ac'a-ta. * Xa can jare' re chalabem-pa chaka tak xkanimaj re Dios. ⁶Y vo xa can ja re ye'rubij re Dios re ye'kaban, can nakajo-ki'. * Roma reja' nubij che can takajo-ki'. Y yex itaman che quire' nubij, roma xic'axaj-yan tak xinimaj re Dios.

⁷Y can je q'uiy c'a re ye'k'olo quichin re vinak re ye'biyaj chach re ruch'ulef, re ye'bin che re Jesucristo tak xpa vova' chach re ruch'ulef, man xoc-ta ancha'l yoj re yoj vinak. Y re nibin quire' chij re Jesucristo,* jare' re nibex anticristo cha re nik'olo quichin re vinak. ⁸Jac'a yex re

* 1 P. 5:1. * 2 Ts. 2:13; 1 Jn. 3:18. * 1 Ti. 1:2; Ap. 1:4. * 3 Jn. 3. * 1 Jn. 2:7, 8.
* Jn. 14:15, 21; Ro. 13:8; 1 Jn. 2:24; 5:3. * 1 Jn. 2:22.

jabal yixsamajenak-pa riq'uin re Dios, tichajij re ic'aslen, chin quire' can-ta tz'akat re rajal-ruq'uixel* xtic'ul roma re isamaj.

⁹Jec'o vinak niqibij che c'o más na'oj quiq'uin chij re enseñanza chin re Jesucristo, y xa man quire-ta. Roma reje' pa ruq'uixel che ye'jelon-apo riq'uin re Jesucristo, xa ye'el-a riq'uin. Re ye'bin quire!, manak re Dios quiq'uin. Jac'a yoj re man nakaya-ta can re enseñanza chin re Jesucristo, c'o re Karta' Dios y re Ruc'ajol kaq'uin. ¹⁰Vo xa c'o jun xtaapon chuchi-ivachoch y mana-ta re enseñanza* chin re Jesucristo ruc'uan-apo chiva, man tic'ul y man tic'utuj chuka' ruxnokil-rach. ¹¹Roma vo xa xtic'ul y xtic'utuj ruxnokil-rach, can xtikalej* chuka' yex re itzel tak banabal re ye'ruban re jun re'.

Ja ruq'uisibal tak ch'abal cha re carta re'

¹²Y c'o q'uiy cosas ninjo' nimbij chiva.* Pero man ninjo-ta nintz'ibaj más chupan re carta re'. Roma yen can ninrayij che yinapon iviq'uin, y c'ajare' tak xtimbij chiva, chin quire' re kánma can-ta nuna'* che yojqui'cot.

¹³Re je ral re avch'alal niqitak-a ruxnokil-avach. Re avch'alal re' can cha'on-va roma re Dios. Amén.

* He. 10:32, 35. * Ro. 16:17; Ga. 1:8, 9. * 1 Ti. 5:22. * 3 Jn. 13. * Jn. 15:11.